



А Ж Р И М

(даъво аризасини кўрмасдан қолдириши тўғрисида)

Дўстлик шаҳри

2022 йил 16 август 4-1304-2201/1672-сонли иш

Дўстлик туманлараро иқтисодий судининг судьяси А.Тўйчиев раислигида, судья ёрдамчиси А.Розматовнинг котиблигида, даъвогар PAXTAKOR GOLD TEXTILE масъулияти чекланган жамиятининг, жавобгар ASR PAXTASI фермер хўжалиги ва қўшимча жавобгар SILVERLEAFE масъулияти чекланган жамият шаклидаги қўшма корхонасига нисбатан берган даъво аризаси бўйича ишни даъвогар вакили Ғ.Остонов (ишончнома асосида) ва қўшимча жавобгар вакили Ў.Пирназаров (ишончнома асосида)ларнинг иштирокида Дўстлик туманлараро иқтисодий суди биносидаги очик суд мажлиси муҳокамасида иш ҳужжатлари билан бирга кўриб чиқиб, қуйидагиларни

а н и қ л а д и :

Даъвогар PAXTAKOR GOLD TEXTILE масъулияти чекланган жамияти судга ариза билан мурожаат қилиб, жавобгар ASR PAXTASI фермер хўжалиги ва қўшимча жавобгар SILVERLEAFE масъулияти чекланган жамият шаклидаги қўшма корхонасидан солидар тартибда 59599778 сўм асосий қарз ва 7151973 сўм пеняни сўраган.

Суд мажлисида даъвогар вакили тарафлар ўртасида 2022 йил 15 августда тузилган медиатив келишувни судга тақдим этиб, тарафлар ўртасида медиатив келишувга эришилганлиги сабабли даъво аризасини кўрмасдан қолдиришни сўради.

Суд мажлисида иштирок этган қўшимча жавобгар вакили кўрсатма бериб, тарафлар ўртасида медиатив келишувга эришилганлиги сабабли даъво аризасини кўрмасдан қолдиришни сўради.

Иш муҳокамасининг вақти ва жойи тўғрисида тегишли тарзда хабардор қилинган бўлсада, суд мажлисида жавобгар ASR PAXTASI фермер хўжалиги вакили иштирок этмади.

Ўзбекистон Республикаси Иқтисодий процессуал кодексининг 170-моддасига асосан низони жавобгар ASR PAXTASI фермер хўжалиги вакили иштирокисиз кўриб чиқишни лозим деб топди.

Суд иш ҳужжатларини ўрганиб, даъвогар ва қўшимча жавобгар вакиллариининг тушунтиришларини тинглаб, қуйидаги асосларга кўра даъво аризасини кўрмасдан қолдиришни лозим топади.

Ўзбекистон Республикаси Иқтисодий процессуал кодекси (бундан кейин матнда - ИПК)нинг 130-моддасига кўра, суд тарафларнинг келишуви учун



чоралар кўради, уларга иқтисодий суд ишларини юритишнинг барча босқичларида низони ҳал этишга кўмаклашади.

ИПКнинг 131-моддаси биринчи қисмига биноан эса тарафлар низони келишув битимини ёки медиатив келишувни тузиб ҳал этиши мумкин.

Келишув битими иқтисодий суд ишларини юритишнинг ҳар қандай босқичида ва суд ҳужжатини ижро этиш жараёнида, медиатив келишув эса биринчи инстанция судида суд алоҳида хонага (маслаҳатхонага) суд ҳужжатини қабул қилиш учун чиққунига қадар тарафлар томонидан тузилиши мумкин.

Ўзбекистон Республикаси Иқтисодий процессуал кодексининг 107-моддаси 5³-бандига кўра, тарафлар ўртасида медиатив келишув тузилган бўлса, суд даъвони кўрмасдан қолдиради деб белгиланган.

Бундай ҳолатда суд, тарафлар ўртасида медиация тартиб-таомилларини амалга ошириш тўғрисидаги битим бўйича тарафлар ўртасида медиатив келишув тузилганлиги сабабли, даъво аризасини кўрмасдан қолдиришни, Ўзбекистон Республикаси “Давлат божи тўғрисида”ги қонуннинг 18-моддаси 1-қисми 9-бандига кўра, тарафлар ўртасида медиатив келишув тузилган бўлса, ариза кўрмасдан қолдирилганда давлат божи қайтарилиши белгиланганлиги сабабли, иш бўйича олдиндан ихтиёрий тўланган 667518 сўм давлат божини даъвогар PAXTAKOR GOLD TEXTILE масъулияти чекланган жамиятига қайтаришни лозим топади.

Бинобарин, Ўзбекистон Республикаси Иқтисодий процессуал кодексининг 107-моддаси 5³-бандига ва 195-моддасига асосланиб, суд

А Ж Р И М Қ И Л Д И:

Даъвогар PAXTAKOR GOLD TEXTILE масъулияти чекланган жамиятининг, жавобгар ASR PAXTASI фермер хўжалиги ва қўшимча жавобгар SILVERLEAFE масъулияти чекланган жамият шаклидаги қўшма корхонасига нисбатан берган даъво аризаси кўрмасдан қолдирилсин.

Олдиндан ихтиёрий тўланган 667518 сўм давлат божи даъвогар PAXTAKOR GOLD TEXTILE масъулияти чекланган жамиятига қайтарилсин.

Суднинг 2022 йил 02 август ва 2022 йил 09 августдаги ажримлари билан қўлланилган даъвони таъминлаш чоралари бекор қилинсин.

Мазкур ажрим устидан шикоят қилиш (протест келтириш) мумкин.

Судья

А.Тўйчиев

